

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR. S. SUBRAMANIAM  
MENTERI KESIHATAN MALAYSIA**

**PERTANYAAN : LISAN**  
**DARIPADA : YB DR. TAN SENG GIAW [KEPONG]**  
**TARIKH : 17 MAC 2014**  
**SOALAN :**

**YB Dr. Tan Seng Giaw [Kepong]** minta **MENTERI KESIHATAN** menyatakan bilangan makmal perubatan swasta dalam negara. Apakah masalah dan cara untuk menyelesaikannya.

## **Tuan Yang di-Pertua,**

Sehingga kini, terdapat 255 makmal patologi persendirian (*stand alone*) dan 101 makmal patologi di hospital swasta dalam negara. Antara masalah atau isu yang dihadapi oleh makmal perubatan (patologi) swasta di negara adalah seperti berikut:

### **1. Isu kualiti perkhidmatan.**

Dikhuatiri terdapat makmal perubatan swasta tidak mengikut piawaian yang ditetapkan, contohnya memberi keputusan makmal yang kurang tepat, mengamalkan metodologi dan prosedur-prosedur ujian makmal yang kurang sesuai lagi terkini, alat-alat makmal yang kurang mencukupi serta mengamalkan sistem merekod sampel dan keputusan yang kurang mantap;

### **2. Isu kelayakan dan pengalaman kakitangan**

Isu samada kakitangan mempunyai kelayakan, latihan dan pengalaman yang mencukupi dan sesuai serta makmal patologi menyediakan kelas atau pengkhususan tidak berdasarkan kepakarannya;

### **3. Isu permintaan terhadap sampel**

Permintaan terhadap sampel yang diterima dan dihantar keluar ada kalanya melalui mereka yang tidak berkelayakan;

### **4. Isu keselamatan makmal (safety requirement)**

Isu berkaitan penggunaan, penjagaan, penyimpanan dan pembuangan peralatan atau bahan berbahaya mengikut kaedah yang tidak dibenarkan dan memudaratkan orang awam;

## **5. Isu Iklan yang mengelirukan**

Iklan yang agak mengelirukan dan menawarkan ujian pada harga murah dan ada yang tidak diperlukan oleh pesakit; dan

## **6. Tiada penguatkuasaan buat masa ini**

**Tuan Yang di-Pertua,**

Penyelesaian kepada masalah makmal perubatan (patologi) swasta di negara adalah seperti berikut:

### **1. Isu kualiti perkhidmatan**

Akta Makmal Patologi 2007 yang bakal dikuatkuasakan akan mengawal selia perkhidmatan di makmal patologi swasta melalui proses permohonan kelulusan bagi menubuhkan dan menyenggarakan dan pelesenan makmal. Hanya makmal patologi yang mencapai piawaian yang ditetapkan sahaja dibenarkan menjalankan perkhidmatan kelak. Prosedur-prosedur ujian, peralatan makmal, sistem merekod sampel dan pengeluaran keputusan ujian akan dikawal selia bagi memastikan kualiti perkhidmatan terpelihara. Di samping itu, makmal patologi dikehendaki menjalankan kawalan sendiri ("*self regulation*"). Contohnya, Akta Makmal patologi 2007 mewajibkan penubuhan Jawatankuasa Penasihat Makmal Patologi (*Advisory Committee*) yang akan menasihati pemegang lesen dan orang yang bertanggungjawab kepada makmal. Makmal patologi swasta juga dikehendaki terlibat dalam program dan aktiviti kepastian kualiti, termasuk kawalan kualiti dalaman, perbandingan antara makmal (*inter-laboratory comparison*) dan aktiviti audit;

## **2. Isu kelayakan dan pengalaman kakitangan**

Akta Makmal Patologi 2007 mengkehendaki supaya professional jagaan kesihatan yang bertugas di makmal patologi seperti pakar patologi, pegawai sains, dan juruteknologi makmal mempunyai kelayakan dan pengalaman yang mencukupi bagi setiap perkhidmatan yang diberi dan patuh kepada *Code of Professional Conduct* profesion masing-masing. Akta Makmal Patologi hanya membenarkan sesuatu makmal patologi menjalankan ujian mengikut kelas dan pengkhususan dan dilarang membuat ujian-ujian lain yang tidak dibenarkan atau tidak dinyatakan dalam lesen;

## **3. Isu permintaan terhadap sampel**

Akta Makmal Patologi 2007 hanya membenarkan makmal patologi menjalankan ujian melalui permintaan daripada seorang Pengamal Perubatan Berdaftar atau Pengamal Pergigian Berdaftar;

## **4. Isu keselamatan makmal (safety requirement)**

Akta Makmal Patologi 2007 mengkehendaki pemegang lesen memastikan amalan dan prosedur makmal yang baik diikuti oleh semua kakitangan dan mewujudkan polisi mengenainya. Langkah yang sesuai hendaklah diambil bagi melindungi kakitangan dan persekitaran daripada bahaya makmal. Akta ini juga mengkehendaki orang yang bertanggungjawab mewujudkan manual serta latihan kepada kakitangan mengenai keselamatan makmal;

**5. Isu Iklan yang mengelirukan**

Pengiklanan oleh makmal patologi yang dilesenkan adalah dikawal di bawah Akta ini di mana iklan yang dipapar hendaklah tidak mengelirukan orang awam atau melanggar mana-mana peruntukan undang-undang kesihatan; dan

**7. Tiada penguatkuasaan buat masa ini**

Dengan kuatkuasa Akta ini , pemantauan akan dilakukan melalui aktiviti penguatkuasaan yang akan dilaksanakan oleh pasukan Kawalan Amalan Perubatan Swasta Kementerian Kesihatan Malaysia (KKM), melalui pemeriksaan mengejut atau pemeriksaan berkala. Penalti bersesuaian bagi pelanggaran mana-mana peruntukan di bawah akta ini akan dikenakan pada mereka yang terbukti bersalah.

Akta ini juga memberi kuasa kepada KKM untuk menutup mana-mana makmal patologi swasta yang menimbulkan bahaya kepada orang ramai. Apabila Peraturan-Peraturan Makmal Patologi diwartakan, penguatkuasaan Akta ini kelak dipercayai akan menyumbang kepada kesihatan dan kesejahteraan rakyat Malaysia.